

N^o. A. I. N. 3.

EXERCITATIO ACADEMICA,
THEOREMATA
QVATVOR SELECTIO-
RA EXHIBENS;

Quam

Consensu Ampliss. FACULT. PHILOS.

SUB PRÆSIDIO

VIRI Celeberrimi,

M. ANDR. WANOCCHII,

Phil. Pract. & Hist. Prof. Ord.

*Candido bonorum examini modeste
submittit*

LAURENTIUS H. FORBUS/
Ost. Bothn.

In famigeratissimo Aboënsium Lycéo,

Die 1. Julii, Anno post natum Salvatorem 1690.

boris ante meridiem consuetis.

In Auditorio Majori.

Exc. apud JOHANNEM WALLIUM,
Regiæ Univ. Typogr.

VIRIS
Flurimum Reverendis, Rever.
& Clariss:

DNI. JACOBO FROSTERO,
Ecclesiæ Uhloënsis Pastori, nec non
circumiacentium Præposito gravis-
fimo, Mecrenati omni pietate æta-
tem venerando.

DNI. MLAURENTIO LITHOVIO, Pastori in Limingo vigi-
lantissimo, Avunculo quovis officio-
rum genere jugiter prosequendo.

DNI. ZACHARIAE ULHEGIO,
Vice-Pastori in Uhlo dignissimo,
socero filiali animi obseqvio perpe-
tim colendo.

SALUTEM ET PACEM A DEO!

21

Beneficia vestra, Mecæna-
tes & Pat: Plurimum
Rever: quibus me cumu-
latim ornastis, pii in me
affectionis certissima sint indi-
cia quam curæ cordiq; sit vobis mea salus;
adeo enim pondus eorum cum numero & nu-
merus cum pondere certat, ut post præmaturum
eheu Parentis obitum ejus munere vos in or-
bo me tuendo, sustentando & promovendo de-
functos esse satis superque declarent: que qvidē
ego hactenus tacita mecum estimatione sum ve-
neratus, nunc vero jugi debitaq; eorum medita-
tione ad retributionem aliqualem me instigan-
te, intra pectoris angustias vix contentus in
publicam deprecationem resolvi gestit ani-
mus, ingratitudinis notam me nunquam effu-
giturum præsagiens, ni voto satifaciā. Cum
autem tenuitatis mee conscius id pro rei di-
gnitate a me expediri non posse, vosq; benefici-
orum vestrorum Gloriosos decantatores mini-
me passuros intelligam, disputationem hanc ad
mandatum gravissimorum virorum prelo sub-
jectam, vestris nominibus inscripsi, indubita-
tam fovens spem, ut illa velut grati animi
argu-

argumentum de his & horum meritis unicuique publice contestetur, hæc vero illam in se perquam levem, magis reddant commendabilem. Sereno ergo vultu Mecænates & Pat. plurimum Rever: munus hoc charitaceum suscipite, magis ex dedicantis affectu quam erudita concinnatione eam estimantes, quid enim a me in his adhuc non maturo, qui ante biennium, ut nostis, studiis philosophicis valedixi, tantillo temporis spatio egregii & eruditum profici potuit? sufficit mihi pro modulo ingenii si non voto & expectationi saltem mandato vestro hæc satisficisse. Ego interea quod viribus nequeo precibus effere annitar, omnis bonidatorem assidue sollicitando, ut omnimoda benedictione vos undique beatos reddat, quo gregem Christi tutela vestra & commendatum fortiter defendere, defensum fideliter pascere, pastumq; recto tramite ad cœlestes tandem agros uno vobiscum ducere possitis.

Rev. Dignitatum Vest:

Cultor perpetuus
L. S.

VIRO

Venerabili atq; Pereximio

DN. LAURENTIO FORBUS/
Con-Rectori Scholæ Trivial. Uhloën-
sis jam jam designando, Fautori, Be-
nefactori & Amico multis nominibus
perpetim honorando, Theorematæ
proprio Marte elaborata egre-
gie defendant.

M *Ista Dei Forbus venerabilis, ore diserto
Scandere quod pergas pulpita Thespi-
dum,*

*Quodq; sacris addas studiis Philologice, niscens
Dogmata celsa σοΦῶν, rem facis egregiam.*

*Hinc nam clarescit tua virtus, quod vel liquore
Pegaseo tua sint labra rigata bene*

*Protuleras Heliconis agris quos fruct⁹ amœnis,
Cernunturq; probant ingenii genium.*

Adplaudunt ausis muse, gratantur Amici,

*Optantes curæ, stet pretium, vigilis,
Proq; salute tua, calido de pectore vota*

Funden:es, quibus has addo preces humiles:

*Jesus cui totum, tua cætera, teg⁹ sacrasti
Perpetuo gressus, dirigat ipse tuos !!*

*Aff. Etu sincero licet avenā
gracili Cecinit*

L. M. A: F:

LAURENTIUS FORBUS

Per Anagramma

EN, LAURUS, FORTIBUS,

Expositio

FORTIBUS EN LAURUS confertur Mar-
tis alumnis ;
Pallados in Castris Tu quoq; di-
gnus eâ.

JOHANNES J. MATILAIN.



THEOREMA HEBRÆO- PHILOLOGICUM,

De

ετύμῳ, ὀρθογενεῖᾳ & ἴρρητῃ

NOMINIS J E S U.

Sic in non potest, quantum co[n]modi
secū ferat ad rerū fundamentalē
cognitionem exacta etymologiæ
vocum cognitio, in primis in lingua an-
tiquissima sanctaque Hebræa; cuius au-
ctor primusq[ue] inventor, ut est ipse sapi-
entissimus DEUS, qui primo homini
in statu innocentiae eam loquendi fa-
cultatem indidit, *in* miraculum us-
que ipsi rerum indoli sese accom-
modat. Unde docta posteritas, cum no-
mina ip[s]is rebus convenientia impene-
re satageret, propter inopiam eloq[ui]i
humani, & defectum primitivorum, de-
rivativis uti habuit necesse, quorum o-
rigo nisi probe fuerit perspecta, multæ
errorum myriades, non tantum in scri-
ptione vocabulorum, sed in rerum quo-
que iis insignitarum expositione coacer-
vantur, nomine JESU id satis superq[ue]
approbante. Qvod, ut præ cæteris est

A

con-

consideratu dignissimum, ita variis difficultatibus laborans, varia de origine sua patitur opinionum divertia. Quidam enim hoc a Græco *ἰάσω* deducunt, ac si ex *ἴασω* esset *Ιησος*, medicum significans, quod allusionis potius, quam genuini *επίμες* nomine venit appellandum. Plures sanctæ linguæ Hebrææ ortum debere autumant, idque diversimode: alii derivantes a verbo impersonali *Jesch*, *est*, vel *sunt*, *subsistentiā*, *substantiam* & *essentiam* denotante. Alii a nomine Divino *תֵּהֶה־יְהוָה* *Jehovah*, quod ineffabile a Judæis & eorum affecclis, sed superstitiose, habitum, per interpolationem literæ *Schin* factum sit effabile, pronuncieturque *Jeheschuh*; existimantes illi priori *ὑποστάσεως* Christi unitatem, hi posteriori naturarū in una *ὑποστάσει* dualitatem indigitari, scil. divinam per *Jehovah*, & humanam per *Schin* a *Schiloh*, recens natum puerum designante. Verum enim vero cum nomen sanctissimum JESUS non tam personæ, quam officii, & beneficiorum Messiae descrip-

ptionem involvat teste Angelo Matth.
 I. v. 21. & dictæ *Ιόμως* rationes modis be-
 ne multis contra analogiam quoque
 grammaticam & svetas derivationum
 leges peccent, propriæ & genuinæ ra-
 dicis nomine salutari nequeunt. Qvæ-
 runt nonnulli hujus primordia in Lin-
 gua Arabica sed pari successu :
 nec defunt quibus alia placent. At
 quemadmodum aqua e rivulis hau-
 sta semper aliquid impuritatis se-
 cum vehit, e fonte autem solo limpi-
 da ebullit; ita hujusmodi conjecturæ &
 derivationes hinc inde pro llibitu con-
 quisitæ magis magisq; a veritate sunt
 alienæ, adeo ut quædam veram nomi-
 nis hujus significationem penitus de-
 struant, quædam emphasis minuant,
 & sic uberrima consolatione, quæ ex
 dulcissimo nomine JESU recte intelle-
 cto emergit; magna ex parte fideles de-
 fraudent. Omissis ergo his, commodi-
 or origo nobis est investiganda, quæ
 offertur in vocabulo *Jeschua*, descenden-
 te a *Jascha*, in *Hiphil salvavit*. Probatur

que firmiter, ut cætera jam præteream,
duabus rationibus 1. *Convenientia significati-*
onum, secundum redditionem Angeli,
optimi nominis hujus interpretis, loco
supra citato, quæ hic utramq; facit pagi-
nam: 2. *Literarum*, in quibus præter *Ajim*
Græcis & Latinis inimitabile, cui ex li-
bertate σ est substitutum, nulla videtur
differentia. Etymologiæ vero ceu fun-
damento innititur orthographia, in qua
nihil mirum, quod rem acu non tetige-
rint vel ipsi eruditi, cum de ista tam
diversas foverint opiniones. Scribunt
quidam, in primis Jesuitæ, JHESUS, unde
sigillum eorum I.H.S. sed perpe-
ram, ex falsa hypothesi nominis *Jebe-*
schub, cum propria forma, ut modo de-
monstratum, sit *Jascha* adspirationis 11
minime patiens. Rectius ergo facere
videtur alii pingentes JESUS, cui præ-
ter originem ipse quoque stylus Evan-
gelistarum & Apostolorum græcus re-
spondet. Nec obstaculi quicquam po-
nit Schin: ut enim id in *Schloßmoh* & aliis vo-
cibus, ita etiam hic per s commode est
expres-

expressum, quippe in lingua sive græca
 sive latina commodius una litera expri-
 mi non potuit. Detectâ sic orthogra-
 phiâ, supereft ipsa ἐνέργεια explicanda, in
 qua non minus ac in prioribus inveni-
 re licet multos justo delicatores, qui
 nihil suo calculo, nisi quod ad palatum
 eorum sit concoctum, approbant. Ar-
 ridet aliis nomen *Sospitator*, aliis *Serba-
 tor*, vocabulo Salvator, quia parum lati-
 nè sapit, nauceam pluribus movente;
 cui tamen utut ab Auctoriibus non usur-
 pato, saltem eodem jure cum peregrini-
 bus nominibus, quæ usu recepta, teste
 Cicerone, pro latinis usurpantur, frui
 permittendum; eoque magis, quod or-
 tum suum ignobilem significatione val-
 de emphatica compenset. Optimus au-
 tem simulque tutissimus, ut ἐπόμε & ὄρθο-
 γεια φίας, sic etiam ἐνέργειας & εμφάσεως
 μεταφερίens est ipse Spiritus Sanctus, di-
 cens loco citato; καὶ παλέστεις τὸ ὄνομα
 αὐτὸς Ἰησὺν, αὐτὸς γαρ, σώσει τὸν λαὸν αὐτὸς
 δὲ τὸν ἀμφιλέων αἴτιον. Ubi terminus
 a quo, & ad quem liberationis nostræ spi-

lis clare panditur; imo etiam persona liberans, & objectum servandum, haud obscure innuitur; quæ pro rei dignitate diducere impræsentiarum non est nostri instituti.

THEOREMA PNEUMATICUM, DE MODO NATURALITER COGNOSCENDI DEUM.

Quamquā accurata & salutifera Numinis cognitio ex sola Scriptura sacra hauriri & possit & debeat, nihilque de DEO credendum sit, nisi quod divinitus fuerit revelatum, ut pie monent erudit*i*: tamen notitiam ejus saltem aliqualem & obscuram, utilem tamen valde, ipsi quoque naturæ competere, si ne jacturâ veritatis negari non potest, toto genere humano ea dere testimonium perhibente, in quo *nulla gens est tam immansueta, neque tam fera, que non, etsi ignoret, qualis DEUM habere deceat, tamen habendum sciat.* Cic. lib. I. de Leg. Inhaerent enim unicuique, etiam in cunis vagienti, reliquiæ veribonique per lapsum

Pro-

Protoplastorum amissi & deperditi, ve-
 lut rudera, proh dolor! splendidi ædi-
 ficii, quæ matrescente cum annis ju-
 dicio, per sedulam & sobriam creatura-
 rum contemplationem auctæ & restau-
 ratæ, uberiori Numinis cognitione men-
 tes hominum imbuunt; modo bene iis
 uti, rectoq; tramite ad metam conten-
 dere nōrint. Hic autem cursus secun-
 dum rationis dictamen instituitur com-
 modissime per causarum & effectuum
 mutuam subordinationem. Cum enim
 res qvælibet creata ab alio necessario
 dependeat, hocq; vicissim alium sui au-
 etorem agnoscat, adeo ut omnia conti-
 nuo velut nexu a se invicem hæreant,
 & nihil detur in rerum natura, quod
 causa unius existens, alterius non sit
 effectus, juxta vetus & verum axioma:
*Omne quod est, ab alio est: & Nihil est causa
 sui ipsius, tum assurgit mens gradatim
 ab effectu ad causam, eāq; una ad aliam
 usq; dum perveniat ad primam, cui o-
 mnes aliæ, ipsa vero nulli suam debet
 originem, qvam omnino dari postular*

natura ab infinito abhorrens. Hoc ve-
ro legitime peracto una cum τῷ ὄντι
DEI, varia ejus attributa intellectui le-
se insinuant, quod sit *independens*, *primum*
movens, *unus* &c. nisi enim ita se habe-
ret, prima non esset. At ratio his non
dum contenta, penitus τὸ δίοντι DEI in-
trospectum, alis cogitationum volitare
gestit; quo cum immediate non pateat
accessus; nihil quippe sensus movens,
per quos tanquam rationis satellites
omnis naturaliter acquisita cognitio
comparatur, in eo occurrit, hinc per
effecta adscendere nititur, positoque an-
te omnia nihil his inesse, quod non pri-
us fuerit in causa, adjungit illico ani-
mum ad investigandum, quales perfe-
ctiones in creaturis dentur. In quibus
duplicem esse differentiam deprehen-
dens, quod aliæ sint puræ omnique im-
perfectionis labe imminentes, aliæ contra
ei obnoxiae, duplices etiam de iis in DEO
cogitur formare conceptus, tribuendo
ei priores *formaliter*, inter quas vita,
intellectus, & omnia attributa DEI po-
sitiva

sitiva ; posteriores *Virtualiter*, & modo
 longe eminentiori, ut sensus & mem-
 bra corporea : blasphemia enim vi-
 detur rationi, aliquid statuere DEO *a-*
ctualiter inesse, quod perfectissimo enti
 maculam quandam inferat ; ideo per-
 git mens ulterius, removendo omnia ac-
 cidentia , imperfectionis argumenta,
quantitatis scil. *temporis*, *loci*, & *quocunq;*
 ea demum veniant nomine ; unde e-
 manant *immortalitas*, *immensitas*, *invisibili-
 tas*, *simplicitas*, *infinitas*, *omniaq;* attribu-
 te *negativa*, quæ quidem positivi aliquid
 important,, ut ut ob eloquii humani
 imperfectionem maximam partem ter-
 minis negativis effterantur,& hæc omni-
 a ponit in DEO, non ut realiter distin-
 gta, sed quatenus ipsa sunt essentia, quæ
 propter intellectus tantum imbecillita-
 tem melioris cognitionis gratia, per di-
 versas actiones ita concipientur : alias
 compositionē inferret, his omnib⁹ adver-
 santer. Huc usq; extendit te ratio hu-
 mana, confirmaturq; in notitia horum
 opere Conservationis, nec non aliis in-

super rationibus, quas ad unam quamque proprietatem confirmandam satis validas, hic propter nimiam prolixitatem ratio instituti enumerare vetat. Qvod vero nonnulli vires naturæ ad mysterium Sacro-Sanctæ Trinitatis elevent, limites rationis sine ratione transscendunt, cœcitatemq; mentis non æquè perpendentes, in fidei simplicitatem impingunt, cui soli hoc datum est nosse. Credat ergo hoc mens devota, cum non capiat, acquiescat in verbo revealantis, cum nec comprehendat revelationum: tuius enim est captivare judicium sub obsequio fidei, quam habenas ei laxando in re tam sublimi, de qua omnibus seculis in natura altum fuit silentium, variis erroribus se implicare. Haetenus notitia theoretica, cuius individuus comes erit practica, pari modo homini insita, iisque medis, opere scilicet Creationis & Sustentationis confirmanda. Hæc nihil est aliud, quam obligatio in conscientia ad DEUM sincere colendum, & in nominis divi-

divini laudem, omnes nostras actiones, secundum rationis dictamen, instituendum nos obstringens: honorem enim & amorem exigunt ejus beneficia; evi-
nque non tepidum, sed vehementem, & ejusmodi quo omnis boni datorem complecti fas est. Male ergo is etiam Ethnicorum judicio novit DEUM, qui cognitum non amet, amatum non ve-
neretur.

THEOREMA PHYSICUM

DE REQUISITIS SENSATIONIS.

Ardua certe materia, & hoc in pri-
mis seculo, inter veteris Philosophiæ
cultores, Cartesiisque aſſeclas, valde con-
troverſa, ut magnopere ſubeat mirari
humanæ mentis caliginem, quæ ne id
quidem ſine errore percipit, quod per-
ceptioni quotidie eſt obvium. Dari
quidem *Sensationem* nemo sensibus gau-
dens facile negaverit; at de modo,
quo fiat, diſceptatur varie. Nos ergo
ne Charybdim vitando in Scyllam in-
cidamus, rationibus ſat firmis induc̄ti,
vete-

veterum sententiæ subscribimus, illam
 commodissime per *qualitates intentionales* expediri affirmando. Cum enim
 objectum, cuius recte riteqz accommodati præsentia hic omnino requiritur,
 quod essentiam suam in sensus incurrire nequeat, medio est opus, quo
 invicem concilientur, speciebus scilicet
 sensibilibus, quæ in sensorium delatae, ef-
 figiem ipsi repræsentent signato simili-
 lam: sic videt quis imaginem sui in
 speculo expressam, imo etiam alterius
 a tergo stantis, quod sine his fieri non
 posset. Oriuntur vero hæ ex ipsis ob-
 jectis, beneficio formarum, quæ natu-
 rali aptitudine ad multiplicationem sui
 pollentes, non reales tantum, sed & hu-
 jusmodi spiritales, edunt operationes,
 teste Alberto, cuius verba rei naturam
 bene exprimentia hic subjicere non vi-
 detur inutile. *Omnis forma, inquit, est*
multiplicativa sui ipsius, vel realiter, vel spi-
ritualiter: quatuor enim primæ quali-
ties utroqz modo agunt, ut calor tum calorem
realem, una cum atomis igneis in alia mate-

ria producit, tum etiam insimul speciem spiritualis in medio & in organo sensus tactus. Idem judicium esto de ceteris similibus. Plurimae autem sensibiles qualitates, & accidentia omnia sensilia per se, cum vim non habeant agendi realiter, saltem agunt spiritualiter, ut quantitas, licet non sit activa actione reali, hoc est, productiva alterius similis quantitatis, spirituali tamen operatione activa est instrumentaliter; cum enim sit de numero sensilium per se, speciem suam producit, quod non est aliam quantitatem producere, sed sui ipsius imaginem. quæ ipsammet repræsentat. Quemadmodum igitur vana est quæstio; cur calor alium calorem materialem & substantiæ ignis inhærentem producat, cum nulla hujus prædicationis sit alia ratio, quam ipsamet caloris natura, quæ apta est ad alium calorem in alio generandum & multiplicandum; ita etiam vanum est quærere, cur sensiles qualitates in medio & in organo speciem suam producant: etenim suapte naturâ sunt aptæ

aptæ ad speciem multiplicandam: cum enim multo majus sit agere *realiter*, & producere aliquid simile materiale, quod est majoris entitatis. quam producere speciem suam spiritalem, quæ entitatis est minoris; siquidem videmus, qualitates, quæ materialiter agunt, in sensorium agere etiam simul spiritualiter, multis autem agere spiritualiter, quæ realiter agere nequeunt, quemadmodū corpora Cœlestia hæc sublūaria varie & potenter afficiunt, mutant & pati cogunt. Hinc si non miramur, quomodo aliquæ realiter agant, cur mirandū est aliquas agere spiritualiter? Notanda est ulterius harum indoles; quod non æque procul omnium rerum imagines exhibeant, sed nunc proprius, nunc longius, promodulo cuiusq; sensus, cui inserviunt, idemq; requirant medium legitimum, ne vel ob situm objecti longinquum imperfecta reddatur sensatio, vel nimiam præsentiam ultra modum feriantur organa, quod non minus temperie aëris & intermediis, quam loci distantiæ æ-

stimandum: illa enim hac non raro
inturbata sensationem, si non penitus
tollunt, certe multum impediunt. Sie
ventus adversus minuit sonum & odo-
rem, nebulæ obfuscant visum &c. Hu-
jus rei inter alia hanc esse causam re-
or, quod species hæ qualitatibus natu-
ralibus pro vehiculo utantur; color luce,
sonus motione aeris &c. Quæ in initio
vehementiores ab oppositis in medio
reprimuntur, & sic, antequam ad termi-
num pervenerint languescunt. Insuper
necessaria est organi dispositio, nervo-
rum integritas, spirituum animalium
copia, quibus rite præparatis sequitur
sensatio.

THEOREMA ETHICUM DE PERFECTIONE MORALI.

Perverse admodum faciunt vivuntq;
illi, qui præcepta morum vitâ & co-
namine omni exprimere, notitiamq; e
libris haustam experientia pro virili
probare non satagunt, ut quouscq; vi-
res naturæ in civilibus lese extendant,
ipsi intelligere possint; has enim qui
æqua

æqua æstimatione & proprio exerci-
tio metiri non didicit, vim gratiæ Spi-
ritus minus pensitare novit : unde fit,
ut plerique nimis abjecte de iis sentien-
tes, si unius vel alterius virtutis studio
quem detineri vident, id jam non natu-
ræ, sed gratiæ salvificæ adscribant, pu-
gnam appetitus cum ratione pro lucta
carnis & Spiritus interpretentur, & sic
vanis opinionibus decepti, naturalia cum
supernaturalibus turpiter confundant,
falso & frustra gloriantes, sibique persua-
dentes, virtutes naturalibus viribus ac-
quisitas esse vera vivæ fidei & in habi-
tantis CHRISTI documenta , cum quan-
tum a terra cœlum , tantum hæ a se
invicem differant. Idcirco e re esse ar-
bitror perfectionem Ethicam breviter
hic delineare. Ad cuius cognitionē per
gradus adscendimus, præsupponendo an-
te omnia externalium actionū directio-
nem ; adhuc enim voluntati sua compe-
tit libertas, ut despoticum in locomoti-
vam exerceat imperium, & quod judi-
cio intellectus bonum deprehendit , id
prom-

prompto membrorum obsequio in a-
 ctum deducere possit: unde sequitur,
 in cuiusque arbitrio situm esse lingvam
 a scurrilitate, manum ab injustitia, &
 alia membra ab aliis vetitis cohibere,
 iisque ad oppositarum virtutum exer-
 citia bene uti: quod nisi ita se haberet
 totius naturæ ordine inverso, belluina
 profectio vita introduceretur, inania tū
 forent justa Principum statuta, hono-
 res immeriti, pœnæ injustæ, cum ultra
 posse nemo obligaretur; & contra sti-
 mulum absolutæ necessitatis calcitrare
 esset impossibile. Impia hæc sunt vel
 Ethnicorum judicio, qui improbos ob-
 scelus admissum solent gravibus onera-
 re suppliciis, eam in primis ob causam,
 quod rectæ rationis dictamini, & huic
 fundatis legibus inobedientes, libera fa-
 cultate in malum abutantur. Hactenus
 ergo res certa & clara: inest autem ho-
 mini aliquid etiam aliud; appetitus scilicet
 sensitivus, qui propter corruptionem a
 lapsu protoplastorum in nos derivatam,
 ultra modum corporis curam agens,
 in vetita fertur, tantoque non raro im-

petu adversus rationem insurgit, ut, imperio ejus excusso, hominem ad cupiditati satisfaciendum alliciat & impellat. Unde quæstio nonnihil difficilior oritur:
Num hujus quoqu; regimen voluntati competit?
Quidam vehementiâ affectuum perterriti infra eos Ethicæ perfectiones limites figunt, quos transgredi non possit, nec cum internis quicquam commercii habeat: sed hi palmam hosti ante congresum porrigunt, in superiores facultates nimis injurii. Nos ergo ulterius progradimur, eam horum quoqu; moderationem complecti statuentes: reddit enim sui sestatores quodammodo beatos, tranquilitatem animi secum ferens, quæ affectuum se turbantium compressionem omnino præreqvirit; hac vero denegatâ, eliminatur virtus, eos ad normam rationis temperans, cumque; virtute honestas, quod absurdum. Et quid? si sui juris essent hi tam feroce & imperii cupidi, num domitorem agnoscerent sine coatione? non credo. Vincit ergo homo, ni habitum vitiosum prius contraxerit,

victosq; paulatim retundit, ut crebris ex-
ercitiis enervati, tandem instar ferarum
mitescant, & equis indomitis non absi-
miles, sessorem patientur. Hi cum sint
vari, non existimandum, omnes a mul-
tis, sed plerosq; ab uno superari: qualis
enim hæc esset victoria de uno trium-
phando, alteri succumbere? Ideo Cic. in
Orat. pro Sylla, ita vivere regium esse inquit,
ut non modo homini nemini, sed nec cupiditati
inserviat ulli. Quod multis horrorem
fortassis incutit, supra sortem humanam
hoc positum existimantibus; facile ta-
men videtur expertis, qui modum pu-
gnæ didicerunt: non enim omnes si-
simul in nos irruere valent; quippe invi-
cem contrarii; sed nunc sigillatim, nunc
aliquot conjunctim, quos tanto fortius re-
primimus, quanto minoribus instructi
sunt copiis. Sic ex moderatione iræ
appellatur quis *mansuetus*, ex depositione
metus *fortis*, cohibitione amoris *venerei*
castus &c. quæ omnes in hominem, virtu-
ti unice deditum, cadere possunt, imo o-
portet, si alias conscientiam illibatam
ser-

servare voluerit, quæ æque unius ac alterius virtutis opposito labefactatur; excipiendæ tamen sunt infirmitatis humanæ, quibus etiam Christiani sunt obnoxii. Hæc omnia evadent clariora, si mentis aciem in vitam Ethnicorum, lumine naturæ recte utentium, convertere voluerimus; ex quibus aliquos in scenam producere sufficit, cum chartula omnes non capiat. *Epaminondam* puto, *Socratem*, & *Platonem*, viros ob morū probitatem omnium seculorum memoriā dignissimos, quorū exemplis, si Scriptoribus fides habenda, hæc jam dicta pulchre consummantur. Consistit ergo perfectio Ethica, ut multa paucis comprehendam, in affectuum moderatione, & continuo virtutum exercitio, unde quemlibet conjicere posse arbitror, quanto sublimius perfectio Christiana, ad quam omnes Salvatori addicti, summo nisu contendere oportet, terminos suos constituat, cum gratia multo efficacior sit natura. Sed quia ejus considerationis non est hujus loci aliis doctiorib⁹ in Christo & Natura, eam explicandam relinquo.

SOLI DEO GLORIA.